

## § 6. ԲԱԲԵԼՈՆԻ ՀԻՆ ԹԱԳԱՎՈՐՈՒԹՅՈՒՆԸ

1

Բազալտե 9-մետրանոց այդ սյուններից մեկը ներկայումս պահվում է Փարիզում՝ Լուվրի թանգարանում: Վրան սեպագրով փորագրված են Համնուրապիի օրենսգրքի 282 օրենքները, որոնցից մոտ 30-ը ջնջված են: Սյան վերին մասում պատկերված է Համնուրապի արքան, որը Արևի և արդարադատության աստված Շամաշից ստանում է գերագույն դատական իշխանության պատվանշանները՝ օղակը և գայիսոնը:

2

### Համնուրապիի օրենքներից

Եթե որդին հարվածել է հորը, ապա նրա ձեռքը պետք է կտրվի:

Եթե բժիշկը վիրահատում է ազատ մարդուն, և նա մահանում է, ապա նրա ձեռքը պետք է կտրել:

Եթե մարդը կեղծ վկայություն տա և ապացուցի իր ասածը, և եթե դրա պատճառով մարդ մահանա, ապա այդ մարդը պետք է սպանվի:

Եթե մարդը գողանա տաճարի կամ պետության սեփականությունը, ապա նա պետք է սպանվի, իսկ նա, ով գողացածը ստացել էր այդ մարդուց, նույնպես պետք է սպանվի:

Եթե մարդն ապտակի իրենից բարձրին (մեծատոհմիկի, քրմի), պետք է նրան 60 անգամ հարվածել եզան կաշվից պատրաստված մտրակով:

Եթե մարդն իրեն հավասարին ապտակի, նա պետք է վճարի տուգանք:

Եթե մարդու տունն այրվում է, և մեկ ուրիշը, որ գնացել է այնտեղ՝ կրակը մարելու, աչք դնի նրա ունեցվածքի վրա, այդ մարդուն պետք է նետել հրդեհի մեջ:



Միջագետքի հյուսիս-արևելյան մասում՝ Տիգրիսի միջին հոսանքի շրջանում, **Ք.ծ.ա. III հազարամյակում** աքքադացի վերաբնակիչները հիմնել էին **Աշշուր քաղաք-պետությունը**, որի անունով այդ տարածքը հետագայում կոչվեց **Ասորեստան**:

Աշշուրը կարևոր առևտրական կենտրոն էր Աքքադի պետության, իսկ հետագայում Ուրի թագավորության կազմում: Այդտեղով էին անցնում Հայկական լեռնաշխարհից դեպի Միջագետք և Իրանից դեպի Փոքր Ասիա ու Միջերկրականի երկրներ տանող առևտրական ուղիները: Ք.ծ.ա. XVIII դ. Աշշուրը Համնուրապիի պետության կազմում էր, իսկ Ք.ծ.ա. XVI-XV դ. հարկատու էր Միտանիին:

Ասորեստանը նոր վերելք ապրեց Ք.ծ.ա. XIII- XII դ.: Սալմանասար I արքան գրավեց Միտանիին, իսկ նրա որդին՝ **Թուկուլթի-Նինպուրպե I-ը (1244-1208)** գրավեց Բաբելոնիան և հաջող արշավանքներ կատարեց դեպի Հայկական լեռնաշխարհ՝ **Նաիրի երկրներ** դեմ:

**Ք.ծ.ա. XI դ.** Ասորեստանը ենթարկվեց Սիրիայի տարածքից **արամեական ցեղերի** ներխուժումներին, առժամանակ թուլացավ և կորցրեց նվաճված տարածքները:

Իրանի հարավում՝ արևելքից Շումերին հարող տարածքում, **Ք.ծ.ա. III հազարամյակում** առաջացավ **Էլամ պետությունը**: Էլամցիները հաճախակի էին հարձակվում Միջագետքի քաղաքների վրա և հեռանում մեծ ավարով: Ք.ծ.ա. XII դ. նրանք գրավեցին Բաբելոնը և ավար տարան Համնուրապիի օրենքներով սյուններից մեկը: Միջագետքի տիրակալները հիմնականում կարողանում էին պաշտպանել իրենց երկիրը, սակայն չէր հաջողվում ընդհանրապես վերջ դնել էլամական ներխուժումներին: Ասորեստանից Ք.ծ.ա. VII դ. կրած ջախջախիչ պարտությունից հետո միայն էլամցիների ներխուժումները դադարեցին: